

grüne Graß vnd Kreuter im Felde/ anzuschawen/ welche sich selbst sähen/ oder sonsten erhalten/ zu jhrer bestimmten zeit Jährlich auffwachsen/ vnd die Erde wie köstliche Teppichen/ von allerley Farben vnd Blumen in einander gewircket/ bedecken vnd schmücken; Oder die Felder/ so von den Menschen mit allerley Getreyde besäet werden/ wan dieselbige jhren volnkoñenen Wachstumb erreicht haben/ was sie vnsern Augen/ für einen besondern Lust gebehren/ sonderlich wann wir sehen/ daß sie durch einen gelinden Wind erreget/ aneinander rauschen/ vnd von ferne/ bald wie Meereswogen auff vnd nieder sich bewegen; Oder die prächtige Wälder/ welche die Natur nicht allein in der ebne/ vnd in den gründen; sondern auch auff den höchsten Gebirgen vnter der Sonnen/ mit vnterschiedlicher Art schöner grüner/ grosser/ vnd hoher Bäumen fortbringet; Oder einen zierlichen Lustgarten/ der durch Menschen angelegt/ geordnet/ gesäet vnd gepflantzet ist/ welcher mit allerhand schönen Blumen/ vnd vnterschiedlichen Bäumen/ mit besonderer art von hübschen Früchten bedeket/ wol staffiert vnd geziert ist; So müssen wir freylich gestehen/ das solche prechtige zierliche Stücke vnnd ornamenten, welche durch keinerley Kunst der Menschen nachgethan können werden/ die Majestät vnd glori des Königs aller Königen reichlich fürstellen vnd abmahlen. Ja es seynd die ersten Menschen von Gott in einem überauß schönen Garten (welcher von Gott selbst/ wie die Schrift lautet/ gepflantzet war) geschaffen worden/ worinnen sie am allerersten bey den edlen/ fruchtbahren Bäumen/ Laub vnd Graß/ vnd andern Gewächsen/ die vmb sie waren/ die Majestetische vnd gloriosische Wercke jhres Schöpfers haben sehen vnd spüren mögen. Vnd was wolte ich mehr sagen/ hat doch Gott der Allmechtige selbst die vegetabilien, oder ErdenGewächse so bewürdigen wollen/ daß er nicht durch Goldt/ Edelgestein/ vnd Perlen/ ob schon derselbigen auch in H. Schrift/ hin vnd wieder gedacht wird/ Sondern durch prächtige zwey vnterschiedliche fruchtbahre Bäume/ vnsern ersten Eltern die Erkändniß Gutes vnd Böses/ vnd das ewige Leben mysteriosischer weise fürbilden vnd für Augen stellen wollen.

Vnd so wir fürs dritte die Nutzbarkeiten/ nothwendigen/ vnd absolutè vnentbehrlichen Gebrauch der vegetabilien,/ als da seynd/ daß nicht allein die Menschen/ sondern allerley Thier auff Erden/ von jhren Substantzen (fürnemblich) gespeiset/ ernehret/ vnd bey Leben/ (so lange als es Gott geliebet) erhalten werden/ vnd daß alles Fleisch/ das wir essen/ die Wolle vnd Seide/ damit wir vns bekleiden/ vnd andere Nutzen/ die wir von den Jrdischen Thieren haben/ aus denen/ nach Gottes ordnung/ immutirten, oder veränderten Substantzen der vegetabilien in den Thierischen Cörpern herkommen vnnd entstehen/ erwegen; Wie auch das solche vegetabilische Creaturen allerley Art nothwendiger vnd köstlicher medicamenten geben/ darmit der Mensch/ vnnd zugleich ein jegliches Vnvernünftiges Thier von Kranckheiten/ vnd Leibes Beschwernussen/ denen sie vnterworffen/ entweder kan curirt, oder zum wenigsten (was incurabile ist) mitigirt, oder gelindert werden; Vnd so viel Vnzehlbahre andere particular, oder sonderliche Nutzen mehr/ welche solche createn den Menschen zum besten præstiren können: So finden wir hieran wichtige Vrsachen/ auch die wunderbahre Providentz, oder fürsehung des Allmechtigen zu